

ſpectateur de l'eſtat que ie fais de mon tambour, le donnant aux chiens en ſa preſence: mais puis qu'il n'a pas voulu entrer, il ne laiffera pas d'eſtre jetté dans vn oubly eternel. Le Pere ayant appris l'hiſtoire, fut bien aife d'auoir eſté ſainctement trompé par ce bon Neophyte, qui fut nommé Paul en ſon bapteſme.

Si toſt qu'il fut Chreſtien, il inuita les principaux Sauuages à vn banquet, pour leur rendre raifon de ce qui l'auoit meü à rechercher ſi ardemment le bapteſme, la vie que nous menons ça bas, eſt courte; on nous enſeigne qu'il y en a vne autre remplie de biens eternels, qu'on ne peut obtenir, qu'on ne ſoit laué dans les eaux du bapteſme, il faut donc que ces eaux ſoient de grande importance; on nous dit que ceux qui les meſpriſent, ne doiuent attendre qu'un feu eternel, ſi cela eſt, comme ie croy qu'il eſt, car nos ames eſtans immortelles, doiuent eſtre recompensées ſelon leurs œuures, il me ſemble que i'ay eu raifon, de rechercher les [129] moyens d'entrer dans ces biens, & d'euitter ces grands maux; ne penſés point que l'interet temporel me touche, ou que ie faſſe eſtat de la parenté & de l'alliance des François, ma penſée va plus loing que tout cela.

Au reſte i'ay reſolu de quitter pour iamais nos anciennes façons de faire; ie n'ay plus de voix pour les chants ſuperſtitieux, mon tambour n'a plus de ſon, & ma bouche n'a plus de ſouffle, pour tromper les malades; car toutes ces niaiferies ne leur ſçauroient rendre la fanté, ie veux obeïr à Dieu, & tout ce qu'il defend, me fera interdit pour touſiours.

Le Capitaine de l'Iſle, qui ne frappe que de trauers, & à coups fourrés, voulant raualer cette ſaincte